

Xujun xi kits'ínkjihí nda postru Pablo xuta nínku Filipino

B'í ts'ín kikjaniñaha Pablo xuta nínku xi tjin nanki Filipino

1 An Pablo ko Timoteo, jin xi t'n'exát'aihi Jesucristo. Ngayjee jun xi tintsuboo nanki Filipino, jun xi kik'áts'enuu Jesucristo tísuniñaihi ko ta tísuniñaihi já xi basehe xuta nínku ko já xi ta tjihin xá.

²Kas'enuu kjuanda ko kjuajyu xi tsjáná Ntia Na'miná ko Nda Ntíaná Jesucristo.

B'í ts'ín kitsúya Pablo xi nkú ts'ín nchjantjai xuta nínku Filipino

³Tsjaqa máb'achjihí Ntíaná xki nga f'áítsjenna jun. ⁴Xki nga nchjaka Ntíaná nchjantjájínuu ngatentoo. Tsjo mana nga b'a ts'ian ⁵at'aha nkuhú makaá xinkíá nga t'n'exát'ahaq é n da tsuhu Jesucristo. B'aha ra nistjin nga tjun tsichujinnuu éen ko santaha nd'ai. ⁶Behe k'an nga xi kik'atuts'ihin ni xi nda ajinnuu, kui xi tu nku ngjuaikondjuhú santaha nistjin nga kju'uaí ngáha Jesucristo.

⁷Ajin animana tintsuqajjun, kui nga f'áítsjehenna jun. Xian nga nda ts'ian nga f'áítsjenna jun at'aha nkuhú kjuandaha Ntíaná tísakúná jun ko an, ndaha tsa nubayá kjíiya'yán ko ndaha tsa nginkun já tjíxoo tixinya chich'an é n da tsuhu Jesucristo ko t'ibejñá chja nga najmi é n tiya niu. ⁸Ntíaná be xi nkú ts'ín mjena jun. Kjuatjoho Jesucristo xi tjinajinna, kui xi tjokohonuu.

⁹Nk'ie nga nchjantjájínuu, bankihí Ntíaná nga 'yún kasaá sa kjuatjo xi tjinuu, ko nga 'yún kas'enuu kjuankjintak'un, ko nga kixi kamankjinnuu ni xi ts'e Ntíaná. ¹⁰B'a ts'ín kama ch'ajihinnu má nihi xi kjuaxi nga nda tu xi je kuintsuqahanu ko najmi s'e ni xi n'enijéhenuu nistjin nga kju'uaí ngáha Cristo. ¹¹Kui nistjiun kuakuchjú nkjin t'ikjá ni xi naxu kin'o, xi kitsjánuu Jesucristo nga n'oo tu xi s'ejña chjhi kjuachánkaha Ntíaná ko n'etsjoho ra.

B'í ts'ín kitsúya Pablo nga ngandaha tíma ni xi tíf'ajin

¹²Mjena nga choo, já nts'e, nga ni xi t'imat'an ei, kui xi tu sahá tít'sín nga t'findju é n da tsuhu Jesucristo. ¹³At'aha t'ibe ngayjee

já juhun nda títuun ko ngayjee xuta xingisoo nga ngat'aha Cristo kjǐiya'yúhunna. ¹⁴Tu ngat'aha nga kjǐiya'yán, nkjin já nts'eé 'yún tǐncha ma 'yún k'un Nda Ntǐaná ko tǐncha ma k'un tǐb'énijmǐ éhen.

¹⁵Kjuaxǐ nga tǐn xi tǐb'énijmǐ ni xi kits'ín Cristo at'aha tíma xintak'un ko mjehe nga ts'ín ngana. Tunga tǐhín ngá xi ngayjehe animaha tǐb'énijmǐ. ¹⁶Xi tíma xintak'un, kui xi tǐncha b'énijmǐ Cristo at'aha ngandaha tǐncha bangisjai. Najmi kjuaxihǐ nga b'a tǐncha ts'ín. Ni xi incha mje níhi nk'ie nga tu sahá 'yún sakúna kjuanima nk'ie nga kjǐiya'yán. ¹⁷Tunga máha xuta xingisoo, tǐncha b'énijmǐ Cristo at'aha tǐhin kuatjo. Be nga kjǐiya ei tu xi xinya chich'ihinna én nda tsuhu Ntǐaná nginkun já tǐxóo.

¹⁸Tunga najmi chumi ni ts'ihín ra. Ndaha tsa najmi kjuaxihǐ ko ndaha tsa ngayjehe k'un nga tǐncha b'énijmǐ, xi tu ja ní tís'enijmǐhi ni xi kits'ín Cristo ko kui niu xi tsjo mana. Ko 'yún s'e sana kjuatsjo. ¹⁹At'aha be nk'ie nga tu ngat'aha nga tǐchubantjǐnú nginkun Ntǐaná ko xi nkú ts'ín tǐtsjá nga'yúnna Espirituhu Jesucristo kuitju'a. ²⁰Mje nkjúnna ko tǐkuyá nga ndahachǐ najmi sakúna kjuasuba. Tu sa ní 'yún ndjá kúásinjǐna nd'ǐi xi nkú nga tǐts'in tehente, ko cha kjuachánkaha Cristo ajihin ni xi tǐmat'ain yjonintena. B'a kama tsa tǐjǐna ko tsa ja kabaya.

²¹At'aha an bi nk'ie nga tǐjǐna tǐk'un sa, Cristo tǐjǐna tǐk'uhunna. Ko tsa ni xi tǐbayahana, tu sahá ts'in nganaka. ²²Tsa kúátejǐna tǐk'un sa, 'yún xúbaya xána. Najmi be má nihi xi kj'uajián. ²³At'aha sǐjǐnaya masehen nga joo niu. Mjena k'uejǐná asuntee ko kǐnsehe Cristo. Tsa ni xi kǐnsehe ra Cristo, tu sahá 'yún nda tǐn ngat'a ts'an. ²⁴Tunga ngat'aha ní ngandanuu 'yún machjén saha nga kúátejǐna tǐk'un sa. ²⁵Behé k'an nga b'a tǐn niu, kui nga behena nga kúátejǐna tǐk'un sahana ko nga k'uandaya sana ajinnuu, tu xi 'yún s'ejin sahanuu ko tsjo k'úénuu nga b'a n'oo. ²⁶B'a ts'ín nk'ie nga kuichuse ngáhanuu, tsjo kamanuu nga n'etsjohoo Cristo Jesu.

B'ǐ ts'ín kitsúyaha Pablo xuta nǐnku nga tu nku ndjáhá kuincha

²⁷Nkuhú nga tǐntsubahanu xi nkú ts'ín tǐjehen ra xuta xi y'a én nda tsuhu Cristo. Kui nga tsa kǐnsenuu, skue, ko tsa kjin kúátejǐna, kuint'e én xi nkú ts'ín tǐntsuboo, nga ndjá tincho, nga nkuhú ni xi n'enkjǐntak'un, ko nga nkuhú tǐn'e mo yjonuu nga ta ŋja ta ŋja tǐn'oo nga'yún ngandaha én nda tsuhu Cristo xi s'ejinná. ²⁸Ndahachǐ najmi tu binkjun já kontrannuu. Kui niu xi kuakúchjihǐ xuta xu'bo nga ndyja ko nga jun xi n'ek'ankinnuu. Ntǐaná tsjǐnnuu nga n'e nganoo.

²⁹At'aha jun bi kik'ainuu nga s'ejinnuu Cristo, tunga ta kik'ǐihínuu nga ngat'aha ta choo kjuanima. ³⁰B'a ta ts'ín tǐbitjǐjún kjuanima nd'ǐi xi nkúhu kjuanima xi kiyo nga j'ǐjian ko xi tǐnu'yó nd'ǐi.

B'ǐ ts'ín tsakúya Pablo xi nkú ts'ín tjǐhin nga s'eyaná

2 Kui b'a maha tsa Cristo basinkonuu, kō tsa kjuatjohō tsjá nga'yúnnuu, kō tsa Espirituhū nkuhú títs'ín manuu, kō tsa nda tichasohō kō tíma nimanuu xinkiu, **2**kui nga n'ehenu nga tu xí tsjohó kat'ena. Nkuhú kas'eyanuu kō nkuhú kjuatjo xi kas'eya animanuu. Nkuhú ch'a xinkiu kō nkuhú ni xi n'enkjǐntak'un. **3**Ndaha nku ni najmi tu n'o tsa tu xi n'e nganqha ruu xinkiu kō tsa tu xi nk'a n'esjehenu yjonuu. Tu sa ní nǐmakjua n'esjo yjonuu kō chasohō xinkiu, chasohō xi nkúhu tsa 'yún nk'a tǐen nga jun. **4**Najmi tu nku ni xi ts'ajun chasohō, tǎ chasohō ni xi ts'e já nts'o.

5B'a tǎ ts'ín kas'eyanuu xi nkú ts'ín kis'eyaha Cristo Jesu. **6**Kui xi tu b'a ts'ín Ntǐanáhá, tunga najmi kits'ínnisihí ni nga y'éjǎna chji nga kui xi Ntǐaná. **7**Tu sa ní y'éch'ohō yjohō yáha kui kō nku nda musu kits'ín ma yjohō nga j'ai tsin xi nkú ts'ín tsin xuta. **8**Kō nk'ie nga kik'a yjoninte, kinte ts'asje yjohō. Kint'é'éhen Ntǐaná santaha nga ngji ngabayoo. Kruu kin'ek'ient'á.

9Kui kjuaha Ntǐaná 'yún tse kjuachánka kitsjáha ra, kō kitsjáha nku j'áin xi tu xí 'yúhún nk'a tǐen, **10**tu xi nk'ie nga kuinú'yáha j'áihǐn Jesu kuinchakúnch'in tu yáhá ni xi tjǐn ndjǐojmi ján kō asuntee kō kinte t'anankiu. **11**Kō ngayjee xi tjǐn b'a kuitsu nga Jesucristo xi Ntǐa. B'a ts'ín s'ejǎna chjǐhi kjuachánkaha Ntǐa Na'miu.

B'ǐ ts'ín tsakúya Pablo xi nkú ts'ín k'úéntu xuta nǐnku ajǐhǐn xuta

12Kui b'a maha, jun já nts'ena, xi nkú ts'ín tehente kinu'yá'énnú nk'ie nga tsátejǎjinnuu, b'a tǎ n'oo nd'ai nk'ie nga kjin tǐjǎnanuu. Chankjún Ntǐaná kō kat'atsó nga n'endjuú ni xi títs'ín Ntǐaná ajinnuu nga títs'ínk'ankinuu. **13**At'aha xi nkú ts'ín sasǐhǐn Ntǐaná, kui xi títs'ín nga n'e mjo kō nga n'oo ni xi mjehe.

14Tsa tjǐn ni xi n'oo, najmi tu katuma stinnuu nga b'a n'o kō najmi tu chubatikoo xinkiu, **15**tu xi je kō naxu skuehenuu xuta. Jun xi ntǐhǐ Ntǐaná kō tjǐhin nga je kuintsúbajjuhun xuta xi tjǐn nd'ai xi ch'onk'un kō xi ja kits'ínkatsún kjuankjǐntak'uhun. Katumo ajǐhǐn xuta xu'bo xi nkúhu niñu xi tǐbat'ai má jyuun. **16**Chubanijmíyahanu én xi ts'ínk'iéntu tǐk'uhun xuta. Tsa b'a n'oo, tsjo k'úéna nǐstjǐn nga kj'uaí ngáha Cristo. At'aha nk'ie kama chji nga najmi tu kjuandahá kits'ian nga'yún nga kits'inxá ajinnuu.

17Nk'ie nga s'ejinnuu Ntǐaná, b'a joyaha tsa chje tǐ'bohō Ntǐaná. Kō tsa n'ek'ienna ei, an xi kuichú ma xi nkú joyaha chje xi ts'ínndjuút'a chje xi tǐ'bohō Ntǐaná. Tungá tsjohó tjǐnna ndaha tsa b'a n'ena. Tǎ n'etsjokohō kjuatsjona. **18**B'a tǎ ts'ín tsjo katumanuu kō tǎ tjennú kjuatsjonuu.

**B'i ts'ín kitsúyahá Pablo xuta Filipino
nga ts'íinkjisehe Timoteo**

19Tsa Nda Ntíaná Jesu tsjánte, kitsá ts'inkjísenuu Timoteo tu xi tsjo kamahana nga kuint'e ni xi tíma ajinnuu. 20Najmi tjín sana kj'ái xi nkúhu kui, xi b'a tá ts'ín ts'ínnkjink'un xi nkúhu an nga kjintaha ra jun. 21At'aha kj'ái xutaha bi ni xi ts'e bangisjai, najmi ni xi ts'e Jesucristo.

22Tunga jahá yo xi nkú k'un Timoteo ko xi nkú ts'ín títs'ínxákona nga tǐb'énijmíkona én nda tsuhu Jesucristo, xi nkú joyaha nku ndati xi ts'ínxáko na'mihi. 23Kui nga tǐb'endáhana nga kui ts'inkjísenuu chubá nga skue xi nkú ts'ín s'enda ni xi tíf'ajian. 24Ko behe k'an nga Nda Ntíaná tá tsjántena nga kama kfínsenuu.

**B'i ts'ín kitsúyahá Pablo xuta Filipino
nga títs'íinkjisehe Epafrodito**

25Tunga nd'ai títs'ínnkjǐhin k'an nga tjǐhin nga tá ts'inkjǐsehe ngáhanuu nda nts'eé Epafrodito. Kui xi títs'ínxákona nga tíf'ajinkona kjuanimá ngat'aha Cristo. Kui xi y'exó nga kin'e nibásenu tu xi kuasinkohona nga ts'ín ni xi machjéna. 26Tu xí tíma bahá ra jun ko kjintaha ra jun, at'aha be nga kinu'yó nga kisaté ch'in. 27Kjuaxi kjǐhin nga 'yún ndjáhá kisaté ch'in, nga ja ma kuayáhá kai. Tunga Ntíanáhá tsase nimaha nga kits'ínnkihi. Ko najmi tu suba kui xi tsase nimaha Ntíaná, tá tsase nimana ko an, at'aha tsa k'ien ndo 'yún kama tse kjuabana kai.

28Kui nga kitsá mjehena nga ts'inkjǐsehenuu tu xi tsjo k'úéhenuu nga cha ngáhanu ko tu xi najmi tá 'yún s'entáhana. 29N'ekjǐhoon ndo xi nkú ts'ín tjehen ra xuta xi ts'e Nda Ntíaná. Tsjo kat'enuu nga b'a n'oo. Chankjún xuta xi b'a k'un xi nkúhu kui. 30At'aha ngat'aha xáha Cristo ja ma k'ienntjáíhi ni kai. Kitsjá yjoho ndaha tsa ja ma k'iehén tu xi ts'íintjusuhun ngandaná xá xi kik'ajihiruu.

B'i ts'ín kitsúyahá Pablo nkú ts'ín y'éjña ni xi kis'ehe

3 Kui b'a maha, já nts'eng, tsjo kat'enuu at'aha Nda Ntíaná Jesucristo tíjnajinnuu. Najmi tífehe k'an nga tá kui tá maha ni xi tǐb'et'ánuu, at'aha ngandanuu niu.

2Chúhūun yjonuu já ch'onk'un xi ja yo, xi ch'onk'un xá xi títs'ín, xi mjehe nga n'e circumcision tiya. 3At'aha circumcision xi ndoo, kui xi kich'aá ná xi yankjáán Ntíaná xi nkú ts'ín bakúyaná Espirituhu Ntíaná ko ma 'yún k'aán ngat'aha ni xi kits'ín Cristo Jesu, najmi ngat'aha ni xi n'ehe yjonintená.

4An bi kama nkjún kama 'yún k'an ntje xi y'ahana. Najmi tjín kj'ái xi b'a ts'ín kama 'yún k'un nii xi nkúhu an, 5nga ajihin xuta xi

ntje Israel tjeheŋ ra kitsian ko kin'ena ni circuncision nga tjǐnna jin nǐstjin nga kitsian. Ntje chǎni Benjamin tjeheŋna. Xuta hebreohó xi chána. Nku nda fariseo xi 'yún kits'ǐntjusun chich'in kjuatéxumaha Moise kama. ⁶Kui kjuatéxumoo 'yún kikuhun nga santaha kitsjennki unkie xuta nǐnkuhu Cristo. Naxu tsátejǐna xi nkú ts'ín bakúya kjuatéxumoo. Najmi tjǐn xi ch'on ts'ín kinchjayanena ngat'a ts'e kui niǐ.

⁷Nk'ie bi, ngat'a ts'an 'yún chjǐhi ra ngatentee ni xu'bi, tunga nd'ai tu ngat'a ts'e Cristo xi nkú joyaha ni xi najmi chumi ni chjǐhi ra kits'in ma kui niu. ⁸Nd'ai b'a xian nga najmi chumi ni chjǐhi ra ngayjee niu, at'aha ja be Cristo Jesu. Kui xi Nda Ntiana maha ko kui xi 'yún chjǐ saha ra nga tu mí nihí ni. Ngat'aha Cristo kits'inndyja ngayjee ni xi tjǐnna tu xi kama ts'in nganahana Cristo. Nd'ai nk'ie nga basehe ni xi kindyjo, b'a mana xi nkúhu tsa stjé niu mana. ⁹Mjena kúátejǐnajan ni xi kits'ín Cristo. Nk'ie kits'intjusan kjuatéxumoo. Kuenta ts'an tsangisja nga naxu kuichú ma nginkun Ntiana. Tunga nd'aihi s'ejinna Jesucristo. Kui nga Ntiana títsjáhana nga naxu tíjǐna nginkun tu ngat'aha nga s'ejinna.

¹⁰Ni xi mjena nd'ai, mjena nga skue sisan Cristo ko nga'yúhun Ntiana xi kits'ínkjǐ'áya ngáha ra Cristo ngabayoo. Mjena nga ta sakúna kjuanimá xi kits'ínkjǐ'áhin. Mjena b'a k'úé xi nkú kik'ie Cristo nk'ie nga k'ien ¹¹tu xi ta kj'uaíyahana ko an ajihin xuta k'ien.

B'ǐ ts'ín kitsúya Pablo ni xi kingjásihin nga y'ejǐna

¹²Najmi b'a tíxian tsa ja kisakúna ni xi kuaxian ko a ra tsa ja kama yá xi tjǐhin nga kama. Tunga tu nku tífi tjennkiná ni xi kuaxian, tu xi sakúhuna ni xi kama mjehe Cristo Jesu nk'ie nga kisakúhu an.

¹³Jun já nts'e, najmi b'a mana tsa ja kisakúna niu. Ni xi títs'inná, títs'inchaya ni xi chóo ko títs'in kjua'yúhún ra yjona tu xi sakúhuna ni xi nǐba askahan. ¹⁴Cristo Jesu ts'ínchjén Ntiana nga tǐnchjaná nk'a ján. An bi tífi tjennkia ni xi títsu nga tsjáha xi nt'é éhen.

¹⁵B'a ts'ín tjǐhin nga s'eyahaná ná xi ja tsichu maá xi tjǐhin nga kamaá. Ko tsa tjǐn xi kj'ái ts'ín s'eyaha, Ntiana ta k'uejǐna chjǐhi ni xu'bo. ¹⁶Tunga tjǐhín ni nga tu nku ndjáha kuinchaján ni xi ja kin'ekjǐ'áhin santaha nd'ai.

¹⁷Jun já nts'e, b'a n'oo xi nkú nga títs'ian ko ta chase chubayohoo xuta xi b'a ta tíincha ts'ín xi nkú ts'ín kik'iejǐna chubayaihi. ¹⁸At'aha nkjin maha xi tjǐntu xi nkúhu tsa tu kjuandahá kin'ek'ien Cristo at'a kruu. Ja ma nkjin niyá b'a xinnuu ko nd'ai santaha tíinta ts'íhinna nga tíxinyanuu xi nkú ts'ín tjíyaha xuta xu'bo. ¹⁹Kui xi tíincha fi má nga ndyja, ko ni xi incha mjehe s'ehé kui xi ntíaha. Tíincha bangisjai kjuachánka ajihin ni xi tu subahá maná, ko tu nku ni xi ts'ehé asuntee tjǐntuyáha kjuankjintak'uhun.

²⁰Tunga máha ná, nanki xi tijná nk'a ján tjeheñná. Yohó nankiná má nga tíchuyáha nga nibajehen Nda Ntíaná Jesucristo xi ts'ínk'ankiná. ²¹Tjihín nga'yún nga kuatéxumaha ngatentee ni xi tjin ko ts'ínchjén nga'yúhún nga ts'ínk'óntjaiya yjoninte x'an xi kich'aá nd'ai. Xi nkú ts'ín tjihín kjuachánka yjonintehe, b'a ta ts'ínk'íé xi ts'añá.

B'i ts'ín kitsúya Pablo ni xi incha ts'ín xuta ninku Filipino

4 Kui b'a maha, já nts'ena, tjo nkjúnna jun ko f'áitsjenna jun. Jun xi kjuatsjona ko nga chjihí xána. Tu nku b'a n'e ndjáhá tinchajun Nda Ntíaná, jun xuta tjona.

²Tíbankihí na Ebodiá ko tíbankihí na Sintike nga kanchjako nda ngáha xinkjín at'aha nkuhú Nda Ntíaná incha yjanki. ³Ko ji ta tíbankihí nga ts'ínkoi jminchjún, ji xi b'a ta tsu xá xi t'n'ei. At'aha nga y'enijmía yo, kui jminchjún ta y'énijmí én nda tsuhu Ntíaná, xi nkú nga ta kits'ín nda Clemente ko xuta xingisoo xi kits'ínxákona. Kui xi ja tjíntut'á j'áhihín xujun má nga tjíntut'á j'áhihín xuta xi k'úéntu t'ík'un sín.

⁴Kas'enúu kjuatsjoho Nda Ntíaná. B'ahá ta tíxin ngáhanuu. Tsjo kat'enúu. ⁵Ngatentee xuta incha kate nga nda animanuu. Ja tijná tiña Nda Ntíaná.

⁶Najmi tu chumi nihi xi fantaha ruu yjonuu. Tu sa ní tehente t'inyohoo Ntíaná ni xi machjénnuu nga chubakoo. Tinchíhuu ko ta tjohoon máb'achjihí ni xi tí'bainuu. ⁷Kjuajyuhu Ntíaná xi najmi mankjihín xuta, kui xi kúhún animanuu ko tsjáníyá xi nkú ts'ín n'enkjínk'un at'aha Cristo Jesu ts'enúu.

⁸Ko ni xi fekuhu, já nts'e, tíbankinuu nga n'enkjínk'un ni xi naxu tjin, ni xi yankjún, ni xi nda, ni xi je, ni xi tsjo k'un, ni xi nda chasehe. Ngayjee ni xi 'yún nda ko ni xi sasinná, kui ni xi n'enkjínk'un. ⁹N'etjusun ni xi tsakuyánuu ko xi kixinyanuu nga n'oo, ni xi kinu'yó nga kinchja ko xi kiyo nga kits'ian. B'a n'oo ko k'úéjñajinnuu Ntíaná xi tsjáná kjuajyu.

B'i ts'ín kitsjáha Pablo máb'achjihí xuta ninku Filipino at'aha tsasinkoho

¹⁰Yún títsjana kjuatsjo Nda Ntíaná nga ta kis'entahá ngáhanuu an. Kjuaxi nga tehente kjintahannuu an, tunga santahá ni nd'ai kisakú niyánuu nga tsisinkonú. ¹¹Najmi tsuhu ra tsa ndyjat'ana tsa mí nihi, tsa kui nga b'a tíxihinnuu. At'aha ja kamankjinna nga tsjo k'úéna ajihín tu mí nihí ni xi kamat'an. ¹²Be xi nkú ts'ín bintsúbajían kjuax'an ko ta be xi nkú ts'ín bintsúbajían kjuanchiná. Ja kama nkana tu mí nihí ni, tsa tsé sisinna ko tsa kama bjona, tsa 'yún s'ena

ni kō tsa najmi chumi nihi xi s'ena. ¹³Ts'in chúkjuā tu mí nihí ni, at'aha Cristo tsjá nga'yúnna. ¹⁴Tunga ndahá tǐn'o nga tǐbisinkonú ajihǐn kjuānima xi tǐf'ajian.

¹⁵Jun xuta nǐnku nanki Filipo, yo ni xu'bi. Nk'ie nga tjun y'enijmǐnuu én nda tsuhu Jesucristo kō nk'ie nga tsitja ante Macedonia, ajihǐn xuta nǐnku xingisoo tu nkuhú jun xi tsisinkonú. Kik'ainú xi nkú tǐn kitsjánuu Ntǐaná. ¹⁶Santaha nga tsátejǐna nanki Tesalonika, nku jo niyá ta kin'ekjǐnú ni xi kamachjǐnna. ¹⁷Najmi chje xi tǐ'baínú tǐbangisja. Tǐbangisja níná nga 'yún kas'e sanuu kjuāchiná nginkun Ntǐaná.

¹⁸Ja kits'inkjǐhǐn ngayjee ni xi kin'e nibánú kō santaha tǐb'anki tǐmana nd'aj. Ni xi kin'e nibákonú Epafrodito, kui xi kits'ǐnndjuú ngayjee ni xi machjǐnna. Kui niu xi nkú joyaha nku chje sinjǐe xi ts'ǐnkjǐhǐn Ntǐaná kō sasǐhǐn. ¹⁹Tsjánuu Ntǐaná ngatentee ni xi machjǐnnuu, xi nkú ts'ǐn tǐjǐajin kjuāchiná chánka xi sakújinná Cristo Jesu. ²⁰ǐNtǐaná xi Na'miná maha, kui xi kayaha kjuāchánkaha santaha tu nkjéhé ni! B'a katuma.

B'ǐ ts'ǐn kits'ǐnkje Pablo xujun

²¹Tjohoon kjuasuniñana ngatentee xuta xi ts'e Cristo Jesu. Tǐts'ǐnkjinuu kjuasuniña já nts'eé xi tǐntukona ei. ²²Tǐts'ǐnkjinuu kjuasuniña ngatentee xuta xi ts'e Ntǐaná xi tǐn ei. Kō xi tǐincha ts'ǐnxá ni'yaha nda tǐtjun k'aku Cesar, kui xi 'yún tǐts'ǐnkji sanuu kjuasuniña.

²³Kat'ejǐajinnuu kjuāndaha Nda Ntǐaná Jesucristo.